

**Silaannakkut angallannerup tiguneqarnissaa pillugu Naalakkersuisut
suleqatigiissitamik pilersitsinissaannut Inatsisartut aalajangiinissassaattut siunnersuut
(Saqq.: Inatsisartunut ilaasortaq Per Rosing-Petersen, Partii Naleraq)**

pillugu

Sanaartornermut ataatsimiititaliap

ISUMALIUTISSISSIONAA.

Siunnersuutip aappasaaneerneqarneranut tunniunneqartoq.

Suliarineqarnerani Ataatsimiititaliaq ukuninnga inuttaqarpoq:

Inatsisartunut ilaasortaq Bendt B. Kristiansen, Inuit Ataqatigiit, siulittaasoq
Inatsisartunut ilaasortaq Jens-Erik Kirkegaard, Siumut, siulittaasup tullia
Inatsisartunut ilaasortaq Anders Olsen, Siumut
Inatsisartunut ilaasortaq Jess Svane, Siumut
Inatsisartunut ilaasortaq Villy Olsvig, Inuit Ataqatigiit

UPA 2017-imi ull. 10. maj 2017 siullermereernerani siunnersuut ataatsimiititaliap misissorpaa.

Siunnersuutip imaa aamma siunertaa

Silaannakkut angallannerup tiguneqarnissaa pillugu Naalakkersuisut suleqatigiissitamik pilersitsinissaat siunnersuuteqartup siunnersuutigaa. Piareersatinut taakkununngaa ilanngunneqassapput nalunaarusiami ajornartorsiutaasinnaasut naleqquuttut misissorneqarnissaat kiisalu ajornartorsiutaasinnaasut naleqquuttut eqikkarlugit allanneqarnissaat.

Siunnersuutip Inatsisartuni siullermeneqarnera

Pineqartup siullermeneqarnerani siunnersummut nalinginnaasumik tapersersuisoqarpoq. Taamaattorli siunnersuut una pineqartumut allamut UKA 2015-imi imm. 166-imut tapiliunneqarsinnaanersoq apeqquserneqarpoq, taassisutaasorlu taanna ima qulequtaqarpoq:

”Atlantikup avannaata Kalaallillu Nunaata silaannartaasa angallavigineqarnerisa allaffissornikkut aqunneqarnerata nunatsinnut nuunneqarnissaa pillugu naalagaaffeqatigiit Canadami Islandimilu oqartussanut isumaqatigiinniuteqarnissaasa

aallartinneqarnissaa siunertaralugu danskit naalakkersuisuinut saaffiginninnissamut Naalakkersuisut peqquneqarnissaannik Inatsisartut aalajangiiffigisassaattut siunnersuut. ”

Siunnersuut taassumalu kingunissai annertunerusumik misissuiffiginiarlugit Sanaartornermut ataatsimiitaliami suliarinerata nanginnissaa innersuussutigineqarpoq.

Ataatsimiitaliap siunnersuummik suliaqarnera

2015-imi ukiakkut siunnersuut suliarineqarsimasooq eqqarsaatigalugu siunnersuut una Sanaartornermut ataatsimiitaliap misissorsimavaa. Ataatsimut isigalugu Sanaartornermut ataatsimiitaliaq naliliivoq, siunnersuutit marluusut imminnut mattutinngitsut, kisiannili imminnut assingussuteqartuusut ataatsimoorfefeqartuusullu.

Taamaattumik siunnersuutip akuerineqarsinnaaneranut teknikkut ajornartorsiuteqartoqannginnera Sanaartornermut ataatsimiitaliap isumaqarfiga, sulanullu ingerlanneqalereersunut ilanngullugu suliaq saniatigut ingerlanneqarsinnaasoq.

Siunnersuutip aningaasatigut kingunissai

Inatsisartut suleriaasianni § 33, imm. 1-imi allassimavoq, aalajangiiffigisassatut siunnersuutip piviusunngortinnissaanut siunnersuut tunngavilersugaassasoq siunnersuutillu aningaasatigut allaffissornikkullu kingunissai allaaserineqarsimassasut.

Ataatsimiitaliap maluginiarpaa, taakku naapertorlugit siunnersuutip piviusunngortinnerani siunnersuutip aningaasatigut kingunissai taaneqarsimasut, taamaalillutillu akissaajaatit naalakkersuisoqarfiup sulinerani killissarititaasunit akilerneqarsinnaanerat naatsorsuutigineqartoq.

Tassunga atatilluguttaaq ataatsimiitaliap maluginiarpaa, ilaatigut Naalakkersuisut suleqatigiissitalioreersimasut maana sulisitanik, ilaatigullu suliniutip piviusunngornissaanut akissaajaatit pillugit Naalakkersuisut tassunga atatillugu allatut naliliinissamut pissutissaqaqanngitsut.

Ataatsimiitaliap inassutaa

Tamanna tunngavigalugu siunnersuut taama isikkoqartillugu Inatsisartunit akuerineqassasoq Sanaartornermut ataatsimiitaliap isumaqatigiittup inassutigaa.

Taamatut oqaaseqarluni isumaliutissiisummilu allassimasutut paasinnilluni Ataatsimiititaliap
siunnersuut aappassaaniigassanngortippaa.

Bendt B. Kristiansen,
Siulittaasoq

Jens-Erik Kirkegaard,
Siulittaasup tullia

Anders Olsen

Jess Svane

Villy Olsvig